



QUÆSTIO MEDICA,

CARDINALITIIS DISPUTATIONIBUS,
manè discutienda, in Scholis Medicorum,
die Jovis nonâ Aprilis.

M. JACOBO DE BOURGES, Doctore
Medico, Præsede.

An aër præcipua valetudinis causa?

I.

HUMANUM corpus machina hydraulico-pneumatica audit polioribus Philosophis. Mirabilis hujus æconomia. Quæ si prima veluti fronte explicetur, infinita prorsus apparet partium omnigenarum series. Harum aliæ sunt perpetui pulsus parentes, ut cor & arteriæ; systolen contractione fibrarum, diastolen earumdem relaxatione reddunt. Aliæ jugi & reciprocæ mancitantur respirationi, quam pulmo, diaphragma, multorum, & præcipue intercostalium ordo musculorum absolvit. Glandulæ extant dicatæ secretionibus humorum, quorum alii ut inutiles foras amandantur, alii intus in varios asservantur usus. Motum aliquæ perpetuant, & per totum corpus diffundunt, ut musculi. Cæteræ sensuum organa, quos revocant ad internos externosque, & sensationum ut vocant omnium occasiones non immeritè vocantur. Stupenda prorsus earum omnium symmetria, ansam præbebit semper nocturnis anatomicorum virorum vigiliis, & inquietæ Physicorum meditationi. At si quis sagaciori instructus philosophandi methodo, aut exquisito armatus microscopio, sedem hanc animæ penetret, tunc evolutâ quasi partium omnium compage, totum earum apprehendet artificium. Quæ nunc sensu prævio, colore, saporibus, usu, functionibus à se distant quam plurimum, motu solo, quiete, situ, figurâ, inter se discrepantes intelliget, corpusque universum ad simplicissimas mechanicæ leges referens, anthlias hic, trochleas, spiras & arcus, illic vestes, funiculos, valvulas & receptacula, ubique dadaleos tubulorum gyros introspiciet, viriumque leges experietur easdem hoc in *microcosmo*, quæ a primo rerum ortu, immensæ hujus *macrocosmi* exitere cunabula, ipsumque in præsentiarum, facili & perpetuo motuum ordine, ab edaci præterlabentis ævi injuriâ vindicant.

TAM apta singularum partium conspiratio, vitam corpoream, quæ solis motibus continetur, expectat primi cujusdam impetus impatiens. Qui ambientis *atmosphæra* diversas dotes lustraverit, vix ac ne vix quidem hærebit anceps, cui potissimum causæ, organicas omnes viventis animalis functiones referat acceptas. Aër corpus est pellucidum, fluidum, grave, elaterio donatum. Ex duplici partium genere coalescit. Aliæ tenuissimæ perniciosissimæ agitantur motu; aliæ crassiores densari & resiliere aptæ natæ sunt. Partes illæ dissidentis licet naturæ, mutuam tamen sibi, & amicam præstant operam; ita fit irritus mobilioris substantiæ impetus, crassior si non adsit movenda; iners vero jacet & ignobilis pars crassior, ex eo quod tenuioris commercio orbetur. Ut partes duæ, ita principes totidem in eo qualitates gravitas scilicet, & vis elastica vulgo dicta. Prima unde oriatur adhuc sub judice lis est: altera ramosarum aëris partium porulis, & materiæ subtilis impetui adscribitur. Ambæ infinitis prope modum experimentis illustrantur. Gravitas barometris, embolis, anthliis aspirantibus, siphonibus, tubulis præsertim a Toricello confectis, luculenter demonstratur: Vis elastica, cum multis momentis, tum præcipuè catapulâ pneumaticâ, & vacuo *boyliano* evincitur. Aër continuo nisu & perpetuo pondere aditum corporis tentat. Mille undequaque patent viæ. Ampliata pectoris capacitas costarum ascensu, aëri latum simul, & declive subternit iter. Eundem alimenta, tum solida, tum fluida, in ventriculum secum invehunt. Cutis & cuticulæ ostiola exiguos præbent tramites, ast infinitos. Aër undiquè sanguinæ moli commixtus, ejus circuitum, (a quo vita) concitat ac promover; moleculas attenuat, ferverefacit, sibi invicem committit; coccineum liquorem a corde submissum, atque in impeditis vesicularum pulmonearum ambagibus moras neccentem dissolvit, conterit: ejus ad cordis thalamos reditum faciliorem accelerat: largitur ei particulas, quibus ipse fœtus est, elasticas. Hinc tremulus, & intestinus, (*oscillatorius* quibusdam) purpurearum molecularum motus. Motu concitato, blandus calor subsequitur, quo tota, quandiu durat, animalis æconomia continetur. Hinc ratio fere omnis, purpurei quem induit coloris, redux in cordis sinistrum ventriculum cruor. Hinc ratio felicioris alimentorum in ventriculo coctionis, distributionis per artus singulos, nutritionis, accretionisve, quæ aliud nihil sunt, quam juvante motu sanguinis intestino, gelatinosi laticis, ad vasculorum parietes appulsus facilis; quo vigente corpus univcrsum ad functiones quasslibet blandè accingitur, fracto vero vel debilitato in marcorem abit illicò, atque fatiscente partium textu contabescit.

DUCUNT sensim motus hi omnes, ad spirituum animalium indolem penitus explorandam. Quidni & aër ipse illorum & naturam simul, & nomen sortiatur. Qui respectu plantarum, fossilium, vegetabilium denique cunctorum, spiritus mundi perhibetur, universalis, immensus, ubique diffusus, in humano artificio, flamma vitalis audiat nunc; vitæ corporeæ

3

principium & fons jure estimetur, verbo dicam, spiritus animales vim suam atque originem eidem referant acceptam. In indagandâ eorum naturâ, caveas eos nitri admodum volatilis æmulos temerè pronuntiaveris, aut radiorum instar solarium, ad lucis naturam proxime accedere. Inde procul dubiò nec motuum celeritas in singulis partibus, nec in quibsdam, ut in oculo, vividus manat splendor & temperatus. Nescio quas in illis, sulphureas dotes ne disquiras, quæ phrenitide accendantur, atque insultus moveant spasmodicos; aut acidi ejusdem vitii, ut in melancholiâ & maniâ, mendum remediis insulsis obliterare tentes: ut a spirituum animalium substantiâ insensili, dissident quæ sapes, colores, odores sapiunt, ita exulent ab eorum definitione clarâ & distincta, vocabula hæc erroris, & ambiguitatis plena, quæ nitro-ærea, salina, sulphurea, acida, urinosa sonant, volitantque in ore imperitæ medicorum plebis. Abundè dixeris si ipsos aëris portionem tenuissimam definieris, quæ æthereæ substantiæ æmula, facili negotio per nervorum systēma diffunditur, elaterio vero donata, fibras nerveas frequentiori ictu concutere, atque commovere apta est: sicque contractionem earumdem, suo influxu, relaxationem recessu, perennes & reciprocas perficere.

I V.

CUM ea sit aërem inter, & partes animantium singulas cognatio, non mirum quod pro variis quibus instruitur dotibus functiones variæ emergant, utque vitæ, sic valetudinis, morborumque omnium author præcipuus judicari debeat. Male temperatam aëris constitutionem quam dira sequatur morborum lues, experientia rerum magistra commonstrat. Humidus & gravis corpori gravitatem inducit; in pulmones ægrè delabitur; sanguinem hic ad absolvendam circuitiōnem segniter stimulat; unde laboriosa respiratio, & humido cœlo anhelantium angustia. A sanguine male fermentato, spiritus effertur, ut a corruptâ semel fibrarum tensione, sensuum oritur imbecillitas & inertia. Auditis ingravescit; perit naris emunctæ sagacitas: universi corporis vires enervatæ fatiscunt. Obtunditur Interea latentium intus fermentorum vigor. Hinc manca, & imperfecta ciborum dissolutio, sanguini tenui subsidium parat. Sic debilitatur sensum liquorum agitatio, & laxato fibrarum contextu, multi iique contumaces ingruant morbi necessum est; catarrhi, gravedines, febres diurnæ, alvi profluvia, putredines, apoplexiæ, comitiales affectus, anginae & similes, qui ortum, vimque suam cœli inclementiæ, & perturbato tempestatum ordini sepiissime referant, solique interdum cedant aëris mutationi. Qui igitur in morbis varias ejusdem vires scrutari neglexerit, illum in curandis ægris luctuosum, & inauspicatum pronuntiare ne dubites. Cum ex variâ cœli mutatione, ventorum afflatu, bonâ denique vel pravâ, aptâ vel ineptâ aëris temperie, sumptæ potionis efficacia quandoque judicetur, sumendæ occasio præcepta declaretur.

V.

QUICUMQUE igitur sanitatis suæ rationem duxerit, quid in aëre exoptandum, accipiat paucis. Tenuem, nitidum, sincerum sectetur, in

4
locis mediocriter editis , benè insolatis , aurâ suavi perfatis. Humidum, qualem efficere solent austrina constitutio, maris fluminumque vicinia, solum stagnis, paludibusque scatens, humile, collibus conspectum, minusque a sole collustratum omni ope, sedulâque declinet industriâ; lanienarum, cloacarumve lethales vitet expirationes, quæ ingratos ad narium lamellas odores deferunt, easque tentant ictu fœtido. Prior aëris constitutio corporis totius fibras obfirmat, meatus aperit, humorem exhaurit superfluum, appetentiam suscitât dejectam, cibos optime conficit, atque per totam molem distribuit. Eâdem de causâ celeriter, nulloque negotio in pulmones aër devolutus, implicitos eorum anfractus penetrat & reducit; sanguinem potenter urget, illincque extricat, eamque illi partium resilientium vim suffundit, quæ debito calori luculenter intra eundem accendendo sit satis. Spiritus inde lucidiores a cerebro in corpus irradiant. Ab his animus in lætitiâ pronior; ad sua munia promptior & alacrior. A servato partium eodem tono, & expeditior movendi, & exquisitior sentiendi facultas. Uno verbo bene temperatam cœli constitutionem act onum vitæ integritas comitatur. Hoc pacto quivis immunem a quamplurimis morborum periculis ætatem peragens, *Nestoreos* ducet annos, lubensque colliget.

Ergo aër præcipua valetudinis causa.

Proponebat Parisiis EUSEBIUS ADRIANUS THUILLIER,
Parisiensis, Baccalaureus Medicus, e Regiâ Scientiarum
Academiâ. A. R. S. H. 1699.

Apud Franciscum Muguet, Regis & Facultatis Medicinæ
Typographum.